



Här Fernand Etgen

President vun der Chamber

Lëtzebuerg, den 9. Januar 2020

Här President,

Esou ewéi den Artikel 83 vum Chambersreglement et virgesäit, bieden ech Iech, dës parlamentaresch Fro iwwert de « Littering » un Madamm Ëmweltministesch, un d'Madamm Inneministesch an un den Här Minister fir Mobilitéit weider ze leeden

D'Uwänner vun de Nationalstroossen an de « Chemin Repris » gesinn ëmmer méi aus wéi Mülldeponien. Et ass eng eenzeg Katastroph wéi respektlos datt verschidden Automobilisten a Camionneure mat Plastikfläschen, Béierfläschen, Gedrénsbechsen an oft mat Fastfood-, Pabeier- a Plastikstute längs vun dese Stroossen mat dësem Knascht ëmginn.

Vill Gemengen uechter Land organiséieren an de Méint Mäerz bis Abrëll all Joer Botzaktiounen an hirer Gemeng wou den Dreck op den Uwänner vun de Stroossen agesammelt a geraumt gëtt.

Och Stroossebauverwaltung sammelt Joer fir Joer zeg Tonnen Dreck längs vun den öffentleche Stroossen. De Phänomen vum « Littering » ass net nei, et ass awer feststellen datt den « non-respect » ëmmer méi grouss gëtt.

An dësem Kontext géif ech gäre folgend Froen un Regierung stellen:

- Wat gedenkt d'Regierung a Punkto Sensibiliséierung géint de « Littering » an a Bezuch op e verstärkte Recycling an Ëmweltschutz z'ënnerhuelen?
- Sollt Stroossebauverwaltung net verstärkt Informatiounspanneue géint de « Littering » längs vun den Nationalstroossen a « Chemin Repris » opstelle fir op dese Phänomen opmierksam ze maachen?
- Kéinte beispillsweis net och d'Agents municipaux respektiv Garde champêtre Befugnisser an de Gemenge kréie fir ze sanktionéieren?
- Sollt d'Stof déi ze bezuelen ass net drastesch an d'Luucht gesat ginn fir géint dësen Ëmweltfrelv anzewierken?

Här President, ech bieden Iech mäin déifste Respekt uzehuelen.

Marc Lies
Deputéierten



LE GOUVERNEMENT
DU GRAND-DUCHÉ DE LUXEMBOURG
Ministère de l'Environnement, du Climat
et du Développement durable

Luxembourg, le 11/02/2020

CHAMBRE DES DÉPUTÉS

Entrée le:

11 FEV. 2020

Service central de législation

Monsieur Marc Hansen

Ministre aux Relations avec le Parlement

Objet: Question parlementaire n°1678 – Réponse

Monsieur le Ministre,

J'ai l'honneur de vous communiquer en annexe la réponse à la question parlementaire n°1678 tout en vous priant de bien vouloir en assurer la transmission à Monsieur le Président de la Chambre des Députés.

Recevez, Monsieur le Ministre, l'expression de mes sentiments distingués.

La Ministre de l'Environnement, du Climat
et du Développement durable,

Carole Dieschbourg

Gemeinsam Äntwert vun der Ministesch fir Ëmwelt, Klima a nohalteg Entwécklung, vun der Inneministesch a vum Minister fir Mobilitéit an ëffentlech Bauten zur parlamentarescher Fro n°1678 vum éierbaren Députéierten Marc Lies betreffend "Littering"

Fro 1:

De Ministère fir Ëmwelt, Klima a nohalteg Entwécklung (MECDD) an d'Ëmweltverwaltung (AEV) organiséiere reegelméisseg Sensibiliséierungscampagne fir d'Leit iwwert den Impakt vum Ewechgeheie vun Offall am ëffentleche Raum (Littering) opzklären. D'Campagne "Klengen Offall, grouse Problem" ass 2017 gemaach ginn, an 2018 widderholl ginn. 2019 ass eng Campagne "Offall kann déidlech sinn" lancéiert ginn, wou nieft de Problemer vun der Ëmweltverschmutzung, och d'Auswierkungen op Déieren thematiséiert gouf.

Eng eenzeg Sensibiliséierungscampagne ass sécher net genuch fir de Littering ze vermeiden. Esou Initiative mussen reegelméisseg widderholl ginn, sou datt de Message sech am Bewosstsinn vun de Bierger festsetze kann.

D'Disponibilitéit vun Infrastrukturen a getrennte Sammelsystemer, verbonne mat Gemengentaxen déi en Ureiz si fir datt d'Bierger hiren Offall trennen, hu bewierkt, datt Lëtzebuerg ee vun den EU-Memberstaaten ass, deen déi héchst reell Recyclingsquoten an Europa huet (98,4% fir Glasverpackungen a 95,3% fir Metallverpackungen am Joer 2017).

Et ass och néideg, reegelméisseg Analysen ze maachen, fir ze bestëmmen, wéi eng Zorten Offall an der Natur landen fir da geziilt Mesuren ze ergräifen. D'Ëmweltverwaltung huet esou Studien an de Joren 2008 an 2015 gemaach. D'Resultater vun dëser Studie stinn op emwelt.lu. Déi nächst Studie gëtt dëst Joer gemaach.

Den Offall- a Ressourcemanagementplang vun 2018 gesäit eng Rei vun Ziler a Mesurë fir, fir Offall ze vermeiden oder ze reduzéieren. Och soll déi separat Sammlung vu verschiddenen Offallstréim ausgebaut ginn. Nëmme duerch eng separat Sammlung kann herno och ee qualitativ héichwäerteg Recycling garantéiert ginn.

Duerch eng Rei nei Direktiven am Offallberäich, déi aktuell an nationaalt Recht ëmgesat ginn, kommen och nei Obligatiounen op Lëtzebuerg duer. Hei ginn d'Produzente vu verschiddene Produkter, wéi zum Beispill Zigaretten, mat an d'Responsabilitéit geholl fir de Littering ze bekämpfen. Donieft gëtt aktuell och un enger Null Offall Strategie geschafft, déi ënner anerem d'Zil huet, Eeweeverpackungen ze vermeiden oder ze reduzéieren.

Fro 2:

Et wäerte weiderhin national Campagnen lancéiert ginn, fir de Littering ze bekämpfen. Dobäi wäerten d'Chauffeuren och mat Panneauen laanscht d'Stroossen sensibiliséiert ginn. Méi Panneauen bedeit awer och méi Oflenkung fir den Autofuerer. Den Aspekt vun der Sécherheet muss een also och berücksichtegen.

Fro 3:

Am Projet de loi n°7126 iwwer d'sanctions administratives communales ass virgesinn, dass an Zukunft d'Agents municipaux eng administrativ Geldstrof vu 25 EUR kënnen verhängen fir folgend Vergoegen: „le fait d'encombrer des rues, places ou toutes autres parties de la voie publique, soit en y déposant ou en y laissant des matériaux ou autres objets“. Deen Text viséiert all Dépôt vun Objeten op ëffentlech zougängleche Plaatzten, also och de Littering. De Katalog vu Faiten déi vum Agent municipal an Zukunft kënnen festgestallt ginn, soll am Kader vun den Amendementer zum Gesetzesprojet nach eng Kéier

iwwerschaft ginn. D'Sanktioun vum Littering iwwer den administrative Wee kann awer nëmme stattfanne sou laang wéi et keng aner administrativ oder strofrechtlech Sanktiounen dofir ginn.

Fro 4:

D'Strofe fir Verstéiss géint Ëmweltgesetzter si generell niddereg. Dëst betrëfft och d'Gebitt vun der Offallwirtschaft a besonnesch dem Littering. Mir sinn eis dësem Problem bewosst, deen iwweregens och scho vun internationalen Institutiounen opgeworf gouf, sou wéi am Kontext vum GENVAL-Projet vum Conseil vun der europäescher Unioun iwwert d'Ëmweltkriminalitéit an hir Bekämpfung zu Lëtzebuerg oder während Diskussiounen mat den zoustännege Servicer vun der OECD.

Aus dësem Grond sinn a neien Ëmweltgesetzter, wéi Chemikalien a Biociden, Erhéijunge vu kriminelle Strofe virgesinn an och eng Verbesserung vun der Effektivitéit vum Strofsystem. D'Offallgesetzgebung, déi kuerzfristeg weesentlech geännert wäert ginn opgrond vu den neien europäeschen Direktiven an dësem Beräich, wäert méi héich an ofschreckend Sanktiounen virgesinn, dat besonnesch fir géint de Littering vir ze goen. Och wäert den "Dépôt sauvage de déchets" explizitt als illegal Aktivitéit mat opgefouert ginn.